

〔台南〕

看袂著林木茂生 ê 校園—佇成大校園

你是上帝用心血滴落佇這塊島嶼 ê 一粒種子
佇滿清皇朝坎坷拋荒 ê 土地頂頭釘根孳穎
佇日本帝國炎日嚴酷 ê 考驗之下伸枝展葉
嘛捌受過西方社會自由民主風雨 ê 吹動佢洗禮
一方面你用枝葉全力伸向曠闊 ê 天頂
共四面八方爭取性命閣較濟 ê 空間
證明人生存在 ê 意義佢價值
一方面你共樹根拚命鑽入上深 ê 塗底
佇無人看見無人要意烏暗 ê 所在
搜集社會低層 ê 現實佢真相
成做將來你愛努力 ê 方向佢你欲成長 ê 養份
你粗勇 ê 身影化做一片秋清 ê 溫柔
為濟濟迷失 ê 羔羊提供庇護 ê 陰蔭佢停歇 ê 安穩
你懸大 ê 身軀倚佇這跡狹隘 ê 島嶼
逐工看對遠遠彼片開闊大陸佢久長歷史 ê 方向

想袂到無張持

煞發覺彼个封閉 ê 社會自然形成 ê 野蠻佢壓霸
嘛認清這款古老 ê 帝國長期累積出來 ê 漚爛佢腐敗
真相哪會當予你簡單就來發覺 洩露
抓耙仔當頭白日將你連根挖起
特務仔透暝無停共你分枝斷葉
閣用一條蠻橫 ê 草索一領冰冷 ê 鐵網共你綑縛掩坎
拗曲佇歷史偏僻 ê 壁角禁忌 ê 暗地

此去幾十年來

校園內看袂著你正直 ê 身影
課本裡揣袂出你簡單 ê 名姓
有人傳聞
捌佇風雨基隆河 ê 岸邊看過你孤單沉重 ê 跂步

有時風聲
會佇半暝六張犁 ê 山內聽著你苦悶淒涼 ê 唉嘆
佇某团暝日數念 ê 夢裡
都攏毋敢現身袂當相見
因為鷹犬 ê 爪牙總是無所不在無所不能
恐驚小可仔無細膩就去予個拆裂咬碎唯一 ê 向望

等到聽無銃聲看無血流 ê 數十冬後
早前予你牽教受你啟蒙過 ê 一寡學生
總算有人勇敢倚出來
共你佇烏枋前曾經留落來 ê 殘影碎片
一絲一線沓沓仔補紕起來
將你佇課堂內強欲消失去 ê 輕聲細說
一點一滴勻勻仔收集轉來
勉強揣出你早前 ê 模樣
期待會當閣再轉去彼段難忘 ê 日子
毋知佢一个頭殼猶予戒嚴封鎖內心寄生特務幽靈 ê 人
竟然共你收園佇彼个烏暗冰冷 ê 地下室內
就親像閣再一擺 ê 關禁
毋但看袂著天日
連放風 ê 時間都予個剝削

幾萬坪 ê 土地
敢講無一个所在會當予你容身予你倚起
近百年 ê 校史
竟然漏過彼段重要 ê 字句彼張珍貴 ê 頁面
透早到暗來來去去出出入入 ê 跂步
看無幾个人暫停落來
捌聽過你含冤 ê 嘆氣
對下到頂幾樓懸 ê 冊架數萬本 ê 藏書
敢有佢一本完整詳細
會寫著你驕傲 ê 故事

淺薄 ê 視野狹隘 ê 眼光
干焦看會著面前氣派 ê 大樓先進 ê 設備
看袂著林木茂生 ê 校園
是欲按怎成做頭腳頂尖予人欣羨一流 ê 大學

////////////////

期待明仔載 ê 人一佇 228 紀念館

無
你無毋著
你所讀 ê 冊無毋著
伊真正是確確實實
一筆一畫 ê 烏字
寫佇彼一張一張 ê 白紙頂面

無
你無毋著
你所受 ê 教育無毋著
伊有影是清清楚楚
一字一句 ê 良知
刻佇你有肉有血 ê 心肝內底

是你出世 ê 時代無拄好
是你面對 ê 政權有問題
你 ê 抗議
就親像一粒石頭
損袂醒個無天無地 ê 思想
顛倒損破個虛假 ê 自大
個所知 ê 干焦是貪污佻腐敗
你欲改革
袂輸是一束利光
炤袂清個無情無理 ê 烏暗

只是刺傷個狹隘 ê 自卑
個所看 ê 只有是權勢俾利益
個所想所做 ê 代誌
你真歹去理解無法度相信

是講
你 ê 筆跡猶閣佇咧
咱 ê 希望猶無失落
相信總會有一工
你等會著烏白恰是非分明 ê 日子
咱看會著公平恰正義降臨 ê 世間

////////////////

等待天光－佇王育德紀念館

對 1949 年彼冬熱人
青狂走離開台灣
到 1985 年入秋
雄雄佇日本過身
你一直無機會閣再倒轉來
台灣 ê 形影佇你 ê 夢裡愈來愈清楚
故鄉 ê 字畫佇你 ê 筆下愈來愈沉重

用咱 ê 喙舌共母語一句一句鬥做伙
成做一首詩
佇海 ê 這片
呼叫你撘翻頭
用咱 ê 筆尖共台文一字一字牽相連
鞏出一條橋
對海 ê 彼岸
引徕你行過來

你一步一步𢳂翻頭行過來
早前予個
用權力 ê 牢籠關禁佇記憶 ê 海外
用欺騙 ê 塊埃掩埃佇真相 ê 塗底
拗曲 kah 強欲認袂出來 ê 身影
愈來愈明顯
抹烏 kah 將近看袂清楚 ê 面容
愈來愈清楚

這時陣
袂閣有看著特務早暗咧跟蹤監視
無閣再聽見銃聲四界咧擾亂恐嚇
極加是
一寡魚仔定定探頭出來偷看
幾隻厝鳥不時公開走來攪吵

今仔日起
咱看會著 ê 是國內外無分男女大細
用個好玄 ê 目神
對舊老 ê 相片頂面
沓沓仔走揣長久以來
就罕得出現 ê 往過
咱聽會著 ê 是規台灣毋管東西南北
用個激動 ê 心情
佇生份 ê 文字內底
輕輕仔唸起真久以前
予咱放袂記 ê 故事

行過千萬里遠 ê 路途
漂泊 ê 跂步
欲永遠佇這塊土地停倚靠岸
無愛繼續流浪
回歸 ê 靈魂

會一直倚家己 ê 故鄉安心歇睏
無欲閣再苦悶

經過六十外冬 ê 長暝
堅持毋捌搖動方向毋捌改變
烏暗將欲過去希望就佇頭前
踮這個所在
我恰你做伙
靜靜
等待 天光